

**Pisortanit ikiorsiissutit pillugit Inatsisartut peqqussutissaattut siunnersuut**

**pillugu**

**Inatsisartut Ilaqutariinnermut Ataatsimiititaliaata**

**ISUMALIUTISSIISSUTAA**

**siunnersuutip aappassaaneerneqarnerani saqqummiunneqartoq**

Inatsisartut Ilaqutariinnermut Ataatsimiititaliaat suliarinninnermini ukuningga inuttaqarpoq:

Inatsisartunut ilaasortaq Agathe Fontain, Inuit Ataqtigiit (siulittaasoq)  
Inatsisartunut ilaasortaq Thomas Kristensen, Atassut (siulittaasup tullia)  
Inatsisartunut ilaasortaq Agnethe Davidsen, Siumut  
Inatsisartunut ilaasortaq Tommy Marq aamma Ruth Heilmann, sinniisussat,  
tamarmik Siumumeersut  
Inatsisartunut ilaasortaq Astrid Fleischer Rex, Demokraatit

Inatsisartut Ilaqutariinnermut Ataatsimiititaliaata UKA 2006-imi siullermeerinerup kingorna siunnersuut misissuataarpaa.

**Tusarniaanermi akissutit**

Siunnersuutip suliarineqarnerani atugassatut tusarniaanermi akissutigineqartut nuutinneri Ilaqutariinnermut Ataatsimiititaliap pissarsiarisimavai. Tusarniaanermi akissutigineqartut iluatinnaatillit amerlasuut Ilaqutariinnermut Ataatsimiititaliap qujassutigai.

Siunnersuut marloriarlugu tusarniaassutigineqarsimasoq Ilaqutariinnermut Ataatsimiititaliap maluginiarpaa, tamannalu pitsaasutut isigineqarpoq.

Tusarniaanermili atortussat annertussusaat pisariunerallu eqqarsaatigalugu tusarniaanerit ataasiakkaat sapaatit akunnerinik tallimanik sivikinnerusumik piffissalerneqarsimanerat naammaginavinningsutut Ilaqutariinnermut Ataatsimiititaliamit isigineqarpoq. Kiisalu atortussat kalaallisut danskisullu tamakkiisut pigineqaleraangata KANUKOKA-p kommuninut aatsaat tusarniaassutigisarmagit tassunga atatillugu erseqqissaatigineqassaaq.

Siunnersuut inatsimmut kommunini ingerlatsivinnit aqutsivigineqartussamut assersuutissaqqippoq. Minnerunngitsumik pisuni taama ittuni piareersarnerup ingerlanneqarnerata sukumiisorujussuunissaa assut pingaaruteqarpoq, taamaaliornikkut inatsimmik ulluinnarni atuisussat sukumiisumik tusarniarneqarsinnaaqqullugit misilittakkaminnillu qitiusumik oqartussaasunut tunniussisinnaaqqullugit.

Tamanna tunngavigalugu tusarniaanermut naammaginartumik siunissami piffissaliisarnissamut Naalakkersuisoqarfik Ilaqutariinnermut Ataatsimiititaliamit kaammattorneqarpoq.

### **Siunnersuutip ilusiligaanerata misissornera**

Siunnersuutip ilusiligaanerata missorneqarnissaanut atorfilittamik atugassinneqaqqulluni Ilaqutariinnermut Ataatsimiititaliap Ilaqutariinnermut Inatsisinillu Atortitsinnermut Naalakkersuisoqarfik qinnuigaa. Qinnuiginninneq akuerineqarpoq siunnersuutillu ilusiligaanera pillugu imartuumik ataatsimiititaliap saqqummiussivigineqarpoq.

### **Apeqqutit**

Siunnersuummik suliarinninnermut atugassatut apeqqutit arlaqaqisut akissuteqarfigeqqullugit Ilaqutariinnermut Inatsisinillu Atortitsinnermut Naalakkersuisoq Ilaqutariinnermut Ataatsimiititaliamit qinnuigineqarpoq. Ataatsimiititaliap apeqqutaasa Naalakkersuisunullu ilaasortap akissutaasa nuutinneri isumaliutissiissummut matumunnga ilanngussatut ilanngunneqarput.

### **Siunnersuummut oqaaseqaatigiumasat**

Siunnersuut siullermeerneqarnermini Inatsisartuni partiinit tamanit tunngaviusumik taparserneqarpoq.

Siunnersuummi pingaarnertut tunngaviusut Ilaqutariinnermut Ataatsimiititaliap isumaqatigiittup taparserpai, taakkumi malillugit aningaasaqarnerup tungaanit isigalugu sulineq tamatigut imminut akilersinnaajuartariaqarpoq. Inuit ataasiakkaat imminnut, aappaminnik meeqqaminnillu 18-it inorlugit ukiulinnik pilersuisuusinnaasariaqarput. Illuatungaatigulli imminut pilersorsinnaajunnaarsimagaanni pisortanit ikiorserneqarsinnaasariaqarpoq. Ikiorsinerli sulinermi pissarsiarineqarsinnaasut annikinnerpaaaffianit annikinnerusariaqarpoq.

Piniartut aalisartullu inuussutissarsiummik ingerlatsinnerminni pissutsinik immikkut ittunik atugaqarnerat siunnersuummik siullermeerinnermi oqaluuserineqarpoq. Pisortanit ikiorsiissutinik pissarsinissamut piginnaatitaaffiit pisussaaffiillu pillugit siunnersuummi aalajangersakkat eqqarsaatigalugit piniartut aalisartullu immikkut inissisimannnginnerat Ilaqutariinnermut Ataatsimiititaliamit tusaatissatut tiguneqarpoq. Piniartut aalisartullu piffissani sivikinnerusuni pisortanit ikiorsiissutinik ataasiaannartumik tapiissutitut pisartagaqartariaqarsimatillutik

piniarnermut allagartaminnik tigumminniinnarsinnaanerannut periarfissaqarpoq. Tamanna pillugu apeqqutip 2-p akineqarnerani itinerusumik nassuiaat Ilaqutariinnermut Ataatsimiititaliap innersuussutigaa.

Allamut tunngatillugu aalisartut piniartullu allalluunniit immikkut ikiorserneqarnissaat sulissutigineqartariaqartillugu, tamanna immikkut inatsisiliaq aqqutigalugu pisariaqarpoq.

Iliuusissatut pilersaarutitut atatillugu siunnersuutip aningaasatigit kingunerisassaanut tunngasut Naalakkersuisut KANUKOKA-lu aaqqiissuteqarfisimammattigit Ilaqutariinnermut Ataatsimiititaliap iluarisimaarpaa.

Iliuusissatut pilersaarutit atorneqalernissaat Ilaqutariinnermut Ataatsimiititaliap assorsuaq neriulluarfigaa. Ineriartornissamik pitsanngorsaanissamillu siunertaqarnermi iliuusissatut pilersaarutit pisortanit ikiorsiissutisartut pillugit ilisimasanik atorluarneqarsinnaasunik pitsaasunillu pissarsinissamut ilapittuutaasinnaapput.

Iliuusissatut pilersaarutitik atuinerup assigiinngissitaartuunissaa Ilaqutariinnermut Ataatsimiititaliamit ilimagineqarpoq. Taamaattumik iliuusissatut pilersaarutitik kommunit atuineranni Naalakkersuisoqarfiup misilittagariligaanik ilisimaligaannillu ingerlaavartumik ilisimatinneqartarnissani Ilaqutariinnermut Ataatsimiititaliap qinnutigissavaa.

Kikkulluunniit pisortanit ikiorserneqarnissamik qinnuteqartut imminut pilersorsinnaanissaminnut periarfissaminnik qanoq pitsanngorsaa sinnaanerat pillugu siunnersorneqarnissamut piginnaatitaanerat siunnersuutikkut qulakkeerneqartoq Ilaqutariinnermut Ataatsimiititaliamit erseqqissarneqassaaq.

Iliuusissatut pilersaarutit pillugit siunnersuummi maleruagassanik aalajangersaasoqarnera aammalu pisortanit ikiorsiissutitik pissarsisartut iliuusissatut pilersaarummik suliaqartitsinissamut annertuumik piginnaatitaaffeqarnerat pillugit sukumiisumik paasisitsiniaasoqassaaq.

Apeqqut 8 aamma 9 aallaavigalugit aammalu Naalakkersuisunut ilaasortap akissuteqaataanik sanilliussinikkut isumaginninnermut tunngasunik nakkutilliineq Ilaqutariinnermut Ataatsimiititaliap sukumiisumik oqaluuseraa. Nakkutilliinerup qanoq pitsanngorsarneqarsinnaanera kommuninullu iliuuserineqarsinnaasunik aalajangersaagaliornissaq qanoq annertutigisumik pisariaqartinneqarnerasoq pillugu Ilaqutariinnermut Ataatsimiititaliamut siunnersuusioqqullugu Naalakkersuisoqarfik Ilaqutariinnermut Ataatsimiititaliamit kaammattorneqarpoq.

Nakkutilliineq pillugu nalunaarusiat, kommunalbestyrelsinut kommuninullu nakkutilliisoqarfimmut ingerlaavartumik nassiunneqartartut pillugit Ilaqutariinnermut Ataatsimiititaliaq paasitinneqarsimanngisaannarpoq. Nakkutilliineq pillugu nalunaarusiat kommuninut nakkutilliisoqarfiup sumut atortarnerai Ilaqutariinnermut Ataatsimiititaliamit ilisimaneqanngilaq, tamannalu pillugu kommunit nakkutilliisoqarfiannit oqaaseqaatinik paasissutissanillu

Ilaqutariinnermut Ataatsimiititaliaq tigusaqanngisaannarluni. Isumaginninnermut tunngasuni maleruagassat aqutsivigineqarnerannut Ilaqutariinnermut Ataatsimiititaliap paasitinneqartarnera nukittorsarneqarsinnaaqullugu Ilaqutariinnermut Pisorta qarfiup nakkutilliineq pillugu nalunaarusiaataanik tamakkiisunik siunissami ataavartumik nassinneqartalernissani Ilaqutariinnermut Ataatsimiititaliap kissaatigaa.

Illerfiit angallanneqarnerinut atatillugu aningaasartuutit matussuserneqartarnissaannut siunnersuutip tunngavissiinnginnera Ilaqutariinnermut Ataatsimiititaliamit tusaatissatut tiguneqarpoq.

### **Siunnersuut allannguutissaatut siunnersuutit**

Siunnersuummi § 5-imut nassuiaatit amigaataanerat Naalakkersuisunut ilaasortap iliuusissai Ilaqutariinnermut Ataatsimiititaliamit qilanaarineqarput. Siunnersuummut allannguutissatut siunnersuut nassuiaatitalik periarfissaavoq atorsinnaasoq.

Siunnersuummi § 27, imm. 1, nr. 1-imut oqaasertaliussat nassuiaatillu akornanni naapertuutinngitsoqartoq Ilaqutariinnermut Ataatsimiititaliap maluginiarpaa. Ilaqutariinnermut Ataatsimiititaliap apeqqutaanut 16-imut Naalakkersuisunut ilaasortap akissuteqaataa innersuussutigalugu aallajangersakkamut allannguutissatut siunnersuummik saqqummiussisoqarnissaa Ilaqutariinnermut Ataatsimiititaliamit utaaqqimaarneqarpoq.

Kommunit inatsisissamut nutaamut peqqissaarlutik piareersarluarnissaat eqqarsaatigalugu siunnersuutip atortuulorfissaatut aalajangersakkamut allannguutissatut siunnersuummik saqqummiussinissaq Naalakkersuisut qulakkiissagaat Ilaqutariinnermut Ataatsimiititaliap isumaqatigiittup kaammattuutigissavaa, taamaalilluni Inatsisartut peqqussutissaat 1. januar 2007-imi atortuulernani 1. april 2007-imi atortuulersinnaaqullugu. Peqqussutissap atortuulorfissaanik kinguartitsineq tamanut iluaqutaassaaq maleruagassallu aqutsiviginissaannut Ilaqutariinnermut Pisorta qarfik kommunillu pisariaqartumik piffissalernerneqarlutillu piareersarnissamut periarfissinneqassapput.

Taama oqaaseqarluni Inatsisartut Ilaqutariinnermut Ataatsimiititaliaata peqqussutissatut siunnersuut aappassaaniigassanngortippaa.

Agathe Fontain  
Siulittaasoq

Thomas Kristensen

Agnethe Davidsen

Tommy Marq  
/v Ruth Heilmann

Astrid Fleischer Rex

---

[Ilanngussaq 1](#) (pdf-format)

[Ilanngussaq 2](#) (pdf-format)